



PRIMEIRO MINISTRO

**INTERVENSAUN SUA ESELÉNSIA PRIMEIRU-MINISTRU REPÚBLIKA
DEMOKRÁTIKA TIMOR-LESTE,
DR. RUI MARIA DE ARAÚJO,
IHA OKAZIAUN TOMADA POSE
BA PREZIDENTE NO BA MEMBRU SIRA KOMISAUN
REFORMA LEJISLATIVA NO SETÓR JUSTISA NIAN**

**Sala Sorumutu Prezidénsia Konsellu Ministrus
16 dezembru 2015**

Eselénsia Juis Administradór Tribunal Distrital Díli, Reprezentante Prezidente Tribunál Rekursu

Exmos. Señor membru Governu nian sira

Exmo. Señor Prezidente Komisaun Anti-Korupsaun

Exmo. Señor Reprezentante Prezidente Komisaun Funsaun Pública

Exmo. Señor Prezidente no Membru Komisaun Reforma Lejislativa no Setór Justisa hirak hetan pose

Señora no Señor sira,

Ho ksolok tebes hafoin fo pose ba Prezidente no, membru permanente no naun-permanente, hosi Komisaun foun ba Reforma Lejislativa no Setór Justisa nian sira, ne'ebé harí iha agostu tinan ida ne'e nian.

Ha'u hahú kellas fo parabéns ba sira foin simu pose:

- Dr. Jorge Manuel Ferreira da Graça, membru permanente no Prezidente Komisaun nian;
- Dr. Henrique Côrte-Real de Araújo, membru permanente;
- Dra. Melisa Ibelá Diliana e Silva Caldas, membru permanente; no
- Dr. José Manuel Guterres, membru naun-permanente dezigna hosi Prezidente Tribunal Rekursu.

Ha'u iha serteza katak sira simu knar atu kondús Komisaun foun ida ne'e ho responsabilidade ida boot tebes, hodi tau iha neon katak sira iha mos kompromisu ida atu serbisu hodi serbí no defende país ne'e no interese timor-oan sira nian. Ha'u mos fiar katak, ho imi nia formasaun akadémika, esperiénsia profisionál no kompeténsia téknika nian sira imi bele kaer-hasoru no supera dezafiu hirak ne'ebé sei mosu durante imi hala'o imi nia misaun. Tanba ne'e maka ha'u hato'o ba señor Prezidente no ba señora no señor membru permanente no naun-permanente sira, ha'u nia konfiansa, katak sira sei hala'o sira nia funsaun ho empeñu no dedikasaun.

Ha'u dehan "foun", tanba Komisaun ida ne'e mosu iha Governu Konstitusionál da-VI nia laran, ho ninia estrutura foun, ne'ebé, bazeia ba Planu Estratégiku Dezenvolvimentu tinan 2011-2030, hakarak sai esensiál iha analiza no aperfeisoa instrumentu legál sira ne'ebé bele asegura defeza ba direitu, liberdade no garantia sira, nune'e mos asesu ba direitu, hodi bele hakbesik-an liu tan ba lejislasaun kona-ba ideál demokratiku sira no ba sidadaun sira iha Timor-Leste.

Nune'e maka, Ministru Prezidénsia Konsellu Ministrus, ne'ebé koordena no sentraliza prosesu lejislativu no regulamentasaun Governu nian, hala'o ona konsulta preliminár bara-

barak ba entidade relevante oin-oin, hodi rona sujetaun hirak ne'ebé bele lori setór lejislativu no justisa ba efikásia no efisiénsia ida diak liu.

Governu konsidera katak diálogu entre entidade oin-oin sira ne'e, bele deit fo benefisiu ba Reforma Lejislativu no ba Setór Justisa, bainhira bele kontribui ba hala'o korespondénsia ho interese públiku ida di'ak no efikáz liu.

Tanaba ne'e maka, Komisaun Reforma Lejislativu no Setór Justisa nian, ne'ebé tutela hosi Ministériu ida ne'e, no ohin simu pose, mosu tanba iha nesesidade atu fo kontinuidade ba levantamentu no konsolidasaun ba proposta hirak mosu hosi sorumutu sira ne'e. Komisaun ne'e mos sei hala'o estudu hirak kle'an kona-ba reforma ba lei sira, iha aspetu formál, iha uniformizasaun lejislativa no atu promove modernizasaun ba prosedimentu lejislativu, hodi dezenvolve rekomendasau hirak ne'ebé sei apresenta ba Governu no katak, ho seguru, bele tulun prosesu Reforma Lesjislativu no Setór Justisa nian.

Reforma ida ne'e importante no estratéjiku, atu bele akompaña krelementu no dezenvolvimentu iha ita nia Rain no atu garante prestasaun servisu ida di'ak liu ba populasaun. Krusiál tebes atu halo kuadru legál no normativu sai adekuadu ho kontestu Timor-Leste nian, hodi garante ninia armonizasaun no ba unidade ordenamento jurídiku, hodi bele hadi'a sai diak liu tan kapasidade setór lejislativu no judisiáriu nian, hodi protéje direitu sira povu nian no hodi aumenta povu nia konfiansa no konfiansa hosi investór sira nian ba setór ida ne'e, no buat sira ne'e hotu, sei reflete iha dezenvolvimentu ekonómiku no sosiál ita nia Rain.

Nune'e maka, servisu ne'ebé Komisaun ne'e atu hala'o, tuir ha'u temi ona iha leten, katak importante tebes no ho responsabilidade boot, tanba nia sei sujetar metodolojia hirak foun ne'ebé bele hamosu dinamika foun ida, simples no modernu liu, maibé mos armonizadu.

Ida ne'e maka primeiru pasu Reforma nian ne'ebé transversal no afeta area hirak hanesan boa-governasaun, manutensaun ba pás no seguransa, desentralizasaun, hamenus moris kiak no dezenvolve ita nia Rain.

Eseléncias

Señora no señor sira,

Atu remata, ha'u hakarak hato'o ba membru Komisaun nian sira hotu, ne'ebé foin simu pose, susesu iha hala'o imi nia funsaun foun, hodi serbí ba Estadu no ba povu.

Obrigadu barak no badinas nafatin!

Dr. Rui Maria de Araújo
Díli, 16 dezembru 2015